

DISSERTATIO ACADEMICA,  
REGULAS QUASDAM CIRCA  
**COLLISIONEM**  
**L E G U M**  
OBSERVANDAS,  
PROPONENS

---

QUAM

*Consens. Ampl. SENAT. Philos. in Reg. Acad. Aboënsi,*  
PRÆSIDE

MAG. JOHANNE  
BILMARK,

HIST. & PHIL. PRACT. PROF. REG. & ORDIN.

*Publico Examini modeste submittit*

JACOBUS CARLQUIST,

WIBURGENSIS.

In AUDITORIO MAJORI die XXVII. Junii  
Anni MDCCCLXVIII.

H. A. M. C.

---

A B O Æ,

Impressit JOH. CHRISTOPH. FRENCKELL.

VIR O Plurimum Reverendo atque Clarissimo,  
Dn. CHRIST. HERMAN. CARLQUIST.  
PARENTI INDULGENTISSIMO.

**D**ivinam cernuus veneror Prouidentiam, quæ mihi, gravissimis paupertatis molestiis presso & tantum non oppresso, benigne adeo adsuit, ut ex pulvere in lucem prodire & hoc qualemque prospectum in studiis Litterarum specimen edere queam. Post Supremum Numen Te, Benignissime Parens, quoquis pietatis cultu, qui ingenuum decet filium, prosequi fas est. Tu enim, quæ summa Tua est in me bonitas, sollicitam adeo educationis meæ curam gessisti, ut Tibi potius, quam mibi deesse volueris, non facultatum Tuarum, quæ plus quam mediocres sunt, sed amoris Tui in me, qui intensissimus est, rationem habens. Tanta rependere beneficia, rerum meorum habitus non permittit; in signum tamen gratissimi animi Tibi, Parens Indulgentissime, hanc dissertationem, studiorum meorum primitias, qua par est, reverentia offero, enixe rogans, velis munusculum hoc serena adspicere fronte, Tuoque favore me in posterum quoque amplectii. Ego vicissim Sumnum rerum omnium Moderatorem ardentissimis desatigabo precibus, velit Te, Parens Benignissime, omni felicitatis genere maciatum per longam annorum seriem nobis conservare, ut Ecclesiæ votis & omnium, quotquot Tui sumus, commodis quam diutissime sufficias. Ita ex intimis cordis recessibus vovet, semperque vovebit

PATRIS INDULGENTISSIMI

obedientissimus Filius

JACOBUS CARLQUIST.



### §. I.

**Q**uemuis DEus Optimus Maximus præstans-  
tissimas homini concesserit dotes, quarum  
ope tam ex misericarum barathro, in quod  
primorum parentum culpa incidit, emerge-  
re, quam ad desideratum felicitatis portum perve-  
nire possit; tanta tamen est plerorumque ingenii  
pravitas, ut eximia hæc munera non solum neg-  
ligant, sed etiam beneficam eorundem indolem te-  
meraria vitæ ratione prorsus corrumpant. Atque  
hi fere sunt, qui ordinem naturæ admodum pver-  
tunt. Quum enim, uti eleganter philosophatur  
**CICERO**, *Homines hominum causa sint generati, ut  
ipsi inter se alii aliis profint & in hoc naturam ducem  
sequantur, communes utilitates in medium adferant, &  
mutatione officiorum, dando accipiendoque, tum ari-  
bus, tum opera, tum facultatibus devinciant hominum  
inter se societatem;* Nihilo tamen minus maleferiati  
ad hunc finem omnes cogitationes omniaque con-  
silia sua non referunt, sed ab eodem, quantum pos-  
sunt maxime, recedunt. Nihil enim frequentius ac-  
cidere animadvertisimus, quam ut alter alterius op-  
TQIT  
bus,

bus, fortunis, existimationi, quin & ipsi vitæ & sanguini, quibus nihil est homini carius, insidias struat, eisque decoribus, quibus hominem reliquis animantibus præstare voluit benignissimum Numen, ad opprimendos euertendosque homines, quoties imprimis ferat impunitatis occasio, impotenter abutatur. Ex quibus sequitur, quod miseriānam & per extrema quævis mortales traherent vitam, nisi contra ingrauefcientia malorum agmina quædam invenissent præsidia. Ut hæc firma manerent, in societates commigrarunt hominum manipuli, fœderibusque initis se se obstrinxerunt, ut conjunctis viribus ac consiliis imminentia quævis pericula propulsarent. Societatis autem vinculum ac firmamentum sunt Leges, quæ regulam exhibent, ad cujus tenorem privatorum actus ita sunt determinandi, ut salus publica promoveatur, & sua ipsarum felicitas inde augeatur. Sicut igitur nauis gubernatore, nisi in scopulos impingens peribit, & corpus vivum anima carere nequit; ita nec societas sine legibus constare potest. Quanta propterea hujus, tanta legum tum Diuinarum tum humanarum in conditione corrupta est necessitas.

## §. II.

Per *Legem* communiter intelligimus Decretum Superioris, quo sibi obligat inferiores, ut ad ipsius præscriptum actiones suas componant. Ratio igitur obligationis, legibus obedientiam præstandi, continetur præcipue in idea Superioris. Quum vero Superior

rior sit vel DEus vel Princeps, hinc duplex existit fundamentum, quo quis constitui potest Superior. Scilicet quum summae Numinis in nos bonitati unice acceptum referamus, non solum quod ex chao possibilitatis in theatrum actualis existentiae processerimus, sed etiam quod nos quotidie sustentet atque conservet, eis quoque tam animae quam corporis doribus ornauerit, ut officiorum partibus satisfacere queamus, nec non felicitatis temporalis & æternæ nos participes reddere velit; euidens est, quod a Summo Numine toti dependeamus & quod tanta nobis incumbat obligatio, morem semper gerendi Legibus Divinis, quas & perspicuas & eximiam quandam φιλανθρωπίαν spirantes ipse tulit, quanta ne major quidem concipi potest.

Quod autem cives debeat Principis mandatis obedientiam præstare, hoc arcessendum a pacto fundamentali circa ipsam reipublicæ constitutionem inter Principem & cives inito, vi cuius hi sponte sua & communis utilitatis ergo, alioquin vix obtinendæ, sese abstrinxerunt, ut dicto Principis essent audientes, bonaque sua viresque omnes Principi commodarent tam in publicis commodis promovendis, quam in immorigeris intra officiorum gyrum coercendis. Quem suum Principi devotum affectum homagio solemniter præstito confirmarunt. Ex quibus apparet, quod civibus gravissima incumbat obligatio, Legibus ciuilibus convenienter suam vitam instituendi.

## §. III.

Quod veteres quidam Philosophi, imprimis Stoici sibi aliisque persuadere sint annisi, omnia peccata esse inter se æqualia, nisi qui in Historia Literaria plane hospes fuerit, fugere potest neminem. Quantum autem hi ipsi a veritatis & æquitatis trahite declinaverint, vel exinde appareat, quod fundamenti loco adsumisse videantur, singulis Legibus æqualem obligationis vim inesse. Nos autem, urgen- te ratione, contendimus:

I:o Legibus diversam competere obligationis vim pro diversitate Superioris, qui leges tulerit. Quum enim a DEo dependeamus quoad existentiam, quoad conservationem, quoad felicitatem temporalem, qua fruimur, & æternam, quam ex Ejus gratia exspectamus; Princeps autem in felicitatis civilis semitam nos tantummodo deducat, nihil ipse heic profuturus, nisi egregiis ejus moliminibus exoptatum successum lar- giatur Benignissimum Numen; euidens est, quod plu- ra & fortiora adsint motiva, Legibus Divinis, quam civilibus, obedientiam præstandi, adeoque quod ma- jor incumbat obligatio illis, quam his parendi.

II:o In æstimanda obligatione Legibus obedientiam præstandi, attendendum erit ad ipsius facti qua- litatem, quod non semper ejusdem est momenti, sed pro circumstantiarum ratione admodum vari- at. Etsi enim vel una circumstantia delinquendi volunt-

voluntatem arguat, adeoque ad actionem malam sufficiat; nullum tamen est dubium, quin quo plures adgravantes circumstantiae concurrant, eo vellementior fuerit agentis ad peccandum natus, & quo prorsus natus, eo gravius in legem offendit, eoque magis ipsi imputatur patrata actio. Adde, quod quædam Leges prohibeant actiones, quæ tranquillitatem & felicitatem generis humani, quoties patrantur, immane quantum convellunt, dum alia delicta civitatem minus adficiunt; Adeoque eæ leges validiores merito censentur, quæ illa, quam quæ hæc facinora prohibent. Hinc PUFENDORFIUS, postquam monuisset criminis læsæ Majestatis Divinæ nihil detestabilius cogitari posse, addit; Proximum ab hoc gradum obtinent, que universam hominum Societatem tangunt. Postea que publicum civitatis ordinem perturbant. Inde sequuntur delicta, quæ singulos homines tangunt.

III:º Notum est Leges dispesci in Praeceptivas, quæ versantur circa agenda, seu debita; Prohibitives, quæ illicitis remoras objiciunt, & Permissivas, quæ versantur circa licita. Illicita Quumque salutem publicam disturbent, quam debita & Licta promovent, illa quidem magis, hæc minus, & quum gravius sit, malo quodam affligi, quam bono carere; graviora quoque adsunt motiva Legibus Prohibitives parendi, quam Praeceptivis, & his, quam Permissivis. Unde major obligatio inest Legibus Prohibitives, quam praæceptivis & permisivis.

## §. IV.

Quamvis Leges in felicitatem civitatis ferantur, non raro tamen contingit, ut ipsae inter se ita pugnare videantur, ut altera alterius vim sufflaminet, & tantum non tollat. Hinc existit Legum Collisio, quæ in eo consistit, quando due exstant Leges, quæ invicem quidem non pugnant, & diverso tempore comode impleri possunt, verum quibus satisfieri nequit, quando casu aliquo earundem impletio in idem temporis momentum incidit. Ejusmodi collisiones inter Leges civiles a variis causis suam repetunt originem. Quum enim Princeps seu Legislator finito gaudeat intellectu, nec omnes circumstantias, quæ tamen in aestimanda actionis moralitate momentum trahunt, sibi eo tempore, quo legem fert, plene & distincte representare valeat; fieri potest, ut talis existat circumstantiarum occursus, ut in ancipiti hæreat tum agens, cuius Legis præscriptum potissimum sequi debat, tum Iudex, quam imprimis legem ad factum propositum applicabit. Dico, quod circumstantiarum ratio dubitandi ansam præbeat. Bene enim jam pridem monuit QUINTILIANUS: Nunquam legem legi esse contrariam iure ipso, sed ipsas casu colli- di ac eventu. Deinde ad collisionem Legum civilium multum conducit nimia earum multitudo. Sicut enim Medicus, formulas medicamentorum saepius mutans, vix cavere potest, quin talia subinde ægerto propinentur, quæ contrarium habeant effectum; ita dum Legibus laborat respublica, vix evitari potest,

est, quin inter illas existat collisio. Scientes jam præterimus alias collisionis Legum causas, quippe quarum expositio ad præsens propositum minus pertinet.

## §. V.

His jam præmissis ulterius progredimur, succincte exposituri Regulas in collisione legum observandas:

I:o *Quotiescumque collisio quedam existit inter Legem Divinam sive Naturalem sive Positivam & inter Legem civilem, toties illa huic præferenda.* Quum enim tot sint motiva observandi Leges Divinas, ut præ his evanescant motiva Legibus civilibus parendi, si ipsæ imprimis fuerint illis contraria; obligatio quoque Legibus Divinis parendi tanta est, ut obligatio civilis præ illa in cunctis venire nequeat. Quare etiam in collisione dictarum Legum civiles cedere debent Divinis. Si igitur Princeps sive adfectum impetu in transversum actus sive adsentatorum technis circumventus civibus suis aliquid præciperebat, quod æquitati adeo foret adversum, ut salutem publicam manifeste turbaret, vix erit dubitandum, quin potius parendum sit Legi Naturali jubenti, ut nostram aliorumque felicitatem promoveamus, quam mando principis, momentosæ huic Legi adverso. Ita feso in dubio patriæ statu gesisse cordatos cives, satis docet historia. Sic cum Galliæ Rex CAROLUS IX. lanienam Parisiensem An. 1572. instituisset, atque parem optimorum & innocentium civium stragem

in

in ceteris quoque regni urbibus meditatus, Ducibus  
clandestina mandata, die S: Bartholomæi demum a-  
perienda & exsequenda, ut scilicet Hugonottas o-  
mnes eradicarent, misisset; multi horum ferociter de-  
trectarunt, suas ita cruentare manus. Inter cæteros  
Præfectus Bajonnæ, fortissimus ORTE, litteras Regi  
rescripsit in hunc tenorem: *SIRE, j' ai communiqué le  
commandement de V. M. à ses fidèles habitans & gens de  
guerre de la Garnison: je n'y ai trouvé que bons Citoyens  
& braves soldats, mais pas un bourreau. C'est pour-  
quoi eux & moi supplions très humblement V. M. de  
vouloir employer nos bras & nos vies en choses possibles,  
quelques hazardeuses qu' elles soient, nous y mettrons  
jusqu'à la dernière goutte de notre sang.* MEZERAU  
*Histoire de France Tom II. p. 1167.* Atque hanc præ-  
stantiam legum Divinarum præ civilibus ipsi etiam  
agnoverunt gentiles. Hinc SOCRATES apud PLA-  
TONEM in Apologia: Εγὼ διδάσκω, ὡς ἀρδεῖται οὐαὶ τοῖς αθηναῖοι,  
ἀσπαζόμενοι μὲν καὶ φίλῳ πέισματι τῷ θεῷ μάθειν καὶ διην.  
id est. Ego equidem vos o! viri Athenienses, impense  
diligo atque amo; DEO tamen parere malo, quam vo-  
bis. Ita ANTIGONE apud Sophoclem, cum accusa-  
retur, quod POLYNICEN fratrem contra regis edi-  
ctum sepeliisset, respondit, se tamen non deliquisse in  
legem non scriptam, quæ semper fuisset.

## §. VI.

II. Si collisio quædam existat inter Legem Permis-  
svam & Preceptivam, illa huic cedere omnino debet.  
Simplex

§ ) 9 ( §

Simplex enim permisso nullam inducit necessitatem moralem aliquid vel agendi vel non agendi, quin in permisis unicuique sit integrum juri suo renuntiare. Immo siue is, cui quid permittitur, agat, sive non agat, in utroque casu exiguum symbolam ad salutem publicam plerumque confert. At alia longe ratio est Legis præceptivæ, quippe quæ versatur circa agenda vel debita. Hac enim obligamur ad faciendum quod præscriptum est, tum quod Legislator ita sanxerit, tum quod salus civitatis modo lege definito tutissime promoveatur. Adeoque apparet, quod obligatio parendi Legi Præceptiuæ præualeat obligationi, si quæ modo illa sit, obediendi Legibus permissiuis simpliciter talibus. Ergo etiam hæ Leges illis cedere debent. Veritas hujus propositionis inde quoque confirmatur, quod interdum accidat, ut, quod generaliter permisum videtur, in casu speciali vix permisum haberi queat, videlicet si quis permissione concessa fruens, officii sui paribus rite satisfacere nequeat.

### §. VII.

III: In collisione Legis permissivæ & prohibitive, illa huic cedere debet. Per Legem enim permissivam arbitrio alicujus conceditur quid agendi facultas propterea, quod factum minoris momenti in republica censetur. At per Legem prohibitiuam impedimenta objiciuntur actionibus, quæ felicitatem civitatis turbarent; quamobrem quem Lex prohibitiua hoc intuitu sit valentior permissiva §. III; hæc quoque illi

*cedere* debet. Si quid igitur in se aut generaliter sit permisum, idem tamen moraliter impossibile habetur, si quis tale suscipere non possit, nisi simul in Legem Prohibitivam offendat. In hoc enim casu cessare intelligitur permisso.

§. VIII.

IV:o *Lex præceptiva, ceteris paribus, cedit prohibitiæ.* Per Legem enī Prohibitivam avertitur malum, quod vel integrā civitatem turbaret, vel aliquam saltem civium partem adfligeret; per præceptivæ vero observantiam bonum, pluribus profuturum, obtinetur. Enī vero quum nemo sit, dum modo sapit, qui non bono potius carere, quam præter hujus jacturam auctoramentum mali quoque sentire vult; evidens est, quod major sit obligatio Legem Prohibitivam observandi, quam præceptivam; adeoque, *ceteris paribus, Lex præceptiva cedet Prohibitivæ.* Dico: *ceteris paribus.* Nam incidere possunt casus, quibus exceptio ab hac regula locum habet. Generaliter tamen ipsa vera est, & ratio ejus petenda est ex natura præceptorum adformativorum & negativorum; horum enim obligatio est absoluta, eorum autem conditionata, occasionem agendi præsupponens, quæ non adesse intelligitur, si quis Legem violaret. Quicquid igitur generaliter est præceptum, tale esse definit in illis casibus, quibus committerentur illicita quædam. Hinc CICERO: *Major est auctoritas Legis, quæ vetat, quam illa, quæ imperat: Omnis enim Lex, quæ vetat, fortior propterea, quia corrigit*

*corrigit illam, quæ aut permittit aut imperat.* Ex hoc fundamento recte monent Moralistæ, non esse facienda mala, ut inde eveniant bona. Sic præpostorum omnino pietatis genus est, corium furari & calceos pauperibus, Eleemosynæ loco, dare. Atque ita sese res habet, quoties aliquid absolute est prohibitum: at si non adeo rigide quid fuerit interdictum, exceptioni datur locus. Exemplo res fiet clarius. Ponamus absolute esse interdictum, sed propter rationes mihi prorsus ignotas, transire per locum quendam omnemque prætextus ac veniæ speciem esse sublatam. Ponamus insuper me, cui in obsequio gloria est relicta, ad locum quendam ablegari, omnesque vias huc pervenienti esse interclusas, illa exempta, quæ per dictum locum dicit; certe revertor potius, quam ut transitum, absolute interdictum, moliar, nisi salus publica in anticipi constituta transitum a me, quovis etiam impendio, postulet. Ponamus rursus, mihi constare transitum per locum supra memoratum esse interdictum, ne fructus in ipso loco germinantes avaris carpantur manibus; facile colligere possum, quod mandata mihi commissa ejus sint necessitatis, ut exceptionem faciant a Lege Prohibitiva.

## §. IX.

*In conflictu Legam, ejusdem generis & indolis, quarum altera altera est recentior, posterior est præferenda priori.* Quum enim leges ferantur a Principe, qui salutem publicam esse suam judicat; igitur si in lege lata quid emendet, mutet, aut ejam eandem

dem abroget per aliam legem, quisque præsumere debet, quod hoc propterea faciat, quia felicitas ci-vitatis alia ratione, quam ad posterioris tenorem, commode promoveri non possit. Quamobrem in po-steriori Lege plura & fortiora occurunt motiva, quam in priori ferenda. Ergo major est obligatio parendi Legi posteriori, quam priori: Ergo etiam illa huic præferenda. Bene igitur monet CICERO, quod postrema quæque Lex sit gravissima.

## §. X.

VI:o Quoties collisio existit inter Leges, cetera æquales, peculiaris præfertur generaliori. Lex enim, quæ specialior est, pauciores patitur exceptiones, quam generalis illa, quippe succinēt, magis determi-nat, quid sit faciendum vel omittendum, eoque i-pso indicat, Legislatorem serio admodum voluisse exsecutionem sui mandati. Hunc regulam sequenti exemplo illustrat PUFENDORFIUS: *Lex una est, ne quis die feriato cum armis in publico versetur. Al-lera, ne quis, signo auditō, tumultus indice, domi se con-tineat, sed cum armis Magistratui in foro præsto sit. Tumultus die feriato oritur.* Heic dicendum est po-steriorem Legem habere instar exceptionis, in ordine ad priorem Legem hoc modo: *Ne quis die feriato cum armis in publico versetur, nisi tumultus causa a Ma-gistratu evocetur.* Scilicet in toto Jure generi per speciem derogatur: Si vero Lex specialis præcedit, frequentius est, ut per generalem sequentem tollatur.

## §. XI.

VII:o Prout cuiusvis Legis materia aliam nobilitate, utilitate

*utilitate ac necessitate superat, ita regulariter una altiori præponderat.* Hanc regulam adeo evidentem esse arbitramur, ut vix probatione indigeat. Dabo tamen exemplum in ejus illustrationem. THEMISTOCLES significavit aliquando civibus suis, se inventisse rationem, qua Patriam suam ad potentia culmen evehere posset, petiitque virum probatæ fidei, cui sub silentii rosa aperire posset consilia, quæ secum agitabat. Gestus est ipsi mos, datusque ipsi collega ARISTIDES. Hujus sententiam quum posceret populus, respondit, propositum Themistocles forte utilissimum esse Patriæ, sed simul in maximum ejus dedecus vergere. Hoc ubi comperiit populus, mox, licet indolem facti adhuc ignoraret, quod in eo consistebat, ut comburerent classem Lacedæmoniorum, quæ tempestate acta tempore pacis ad littora Attica adpulerat, prohibuit, ne Themistocles molimina sua persequeretur. Forte tamen & ignominiosum hoc ejus fuit consilium & Patriæ perniciosum. Licet enim vires Lacedæmoniorum isthoc pseudo-Politico stratagemate fregissent Athenienses, simul tamen ob execrandam perfidiam omnes Græciæ populos vel in se concitassent, vel saltum a se abalienassent. Requiritur autem allata regula, ut magis minusve honestum æqualiter sit in nostra potestate; adeoque exceptionem patitur, quando alterum officium re ipsa excludit alterum, illudque impossibile reddit, obligatione, quæ ad unum obstringit, tollente libertatem satisfaciendi alteri.

Hinc CICERO: Primum igitur Leges oportet contende, considerando, utra Lex ad Majores, hoc est, ad utiliores, ad honestiores, & magis necessarias res pertineat. Ex quo conficitur, ut si Leges due, aut si plures, aut quotquot erunt, conservari non possint, quia discrepant inter se, ea maxime conseruanda putetur, quae ad maximas res pertinere videatur.

## §. XII.

VIII:o Quoties collisio Legum existit, toties Lex cogens preferenda est Legi non-cogenti. Lex enim cogens habet conjunctam obligationem perfectam, adeo ut si quis legem transgrediat, potest idem, intentata in foro actione, ad rationem facti postulari & consecaria quævis cum actione conjuncta, ingratitiis etiam, subire. At Legi non-cogenti competit tantummodo obligatio liberalis, quæ libertati agentis relinquit, an & in quantum velit obligari, neminique in foro civili jus perfectum competit, aliquid ab ipso exigendi, quippe qui solo virtutis amore Legi satisfacit. Unde patet, quod strictius obligentur homines per Leges cogentes, laxius per non-cogentes. Ergo illarum obligatio præualet harum obligationi. Sic si quis alteri quid debeat ex contractu inter illos inito, existente collisione, hoc prius erit soluendum ac præstandum, quam quæ ex promissio gratuito, aut Lege gratitudinis aut ex alio affectu debentur.

## §. XIII.

IX:o Denique in collisione quarumunque Legum regula hæc generalis erit tenenda: Lex, quæ plus

plus ad ipsum civitatis finem confert, validior est habenda illa, quæ minus conductit. Omnis enim Lex rationem habere debet in fine civitatis: Enimvero alia Lex majorem, alia rursus minorem in fine civitatis habere potest rationem, quod per se patet, & quotidiana comprobat experientia. Nec minus liquet, rationem ejus Legis, quæ minus ipsum finem tangit, facilius in fine civitatis desinere, quam ejus, quæ magis ad eundem finem spectat. Nam vero, cessante ratione, cessat quoque id cuius ratio; cessante igitur ratione, cessat quoque ipsa Lex. Enimvero cessat facilius ratio illius Legis, quæ minus finem civitatis promovet, quam ejus, quæ magis illum adjuvat: illa igitur facilius cessat, quam hæc. At vero illa Lex, quæ manet, validior dicens est illa, quæ cessat. Ergo validior illa Lex habenda, quæ proprius ipsum civitatis finem spectat.

## §. XIV.

Tandem a Collisione Legum probe distingueda est *Aviowilia* seu Legum contrarietas; hæc enim supponit, Leges sibi invicem vere vel adparenter contradictentes; illa autem talem Legum pugnam non involvit, sed indicat tantum utrique Legi satisfieri non posse propterea, quod earum impletio in idem temporis momentum incidat. Veræ autem *Aviowlias* in Codice FRIDERICIANO exempla habemus nulla, quod consummatam Legislatoris prudentialiam satis superque arguit; apparentis vero quædam occurunt, sed quæ, observatis regulis Hermeneuticis

euticis, facile dispalescunt, nec suspensum diu te-  
nent Judicem. Dabimus unicum ejus exemplum  
B. VI. XXVIII. 12. Gåstgifware sivare sielf för den orätt,  
som han, eller hans hjon gör then vägsarande, och för bedrä-  
geri eller föld böte dubbelt. Sed M. VI. XLII. 3. Stiål  
Skeppare, Forman eller theras folck thet them gifvet är at föra  
eller förvara; giälde thet åter och böte fyra dubbelt tiusnadiens  
värde. I ty fall ware samma Lag; ther Gåstgifware eller  
Krogare från Gästen stiål. Quum igitur in priori lo-  
co imponantur cauponi mulctæ duplices, sed in po-  
steriori quadruples, queritur: annon hic sit con-  
tradictio quædam, præsertim quum delinquens sit  
idem, factumque idem esse videatur? Sed responde-  
mus, quod persona delinquens sit quidem in utroque  
casu eadem, delictum autem revera non sit idem.  
In priori enim loco agitur de furto simplici, in poste-  
riori de qualificato. Ille aufert rem alienam, hic item  
rem alienam surripit, sed suæ fidei ac custodię com-  
missam; adeoque quæ depositi vicem gerit, quod pa-  
tet ex collatione antecedentis & consequentis in poste-  
riori loco. Ita enim M. VI. L. c. Stiål skeppare ic. thet them  
gifvet är at föra eller förvara . . . I ty fall ware Lag samma för  
Gåstgifware.

Essent quidem in isthac argumento multa adhuc  
in medium adferenda, sed temporis augustia impediti,  
heic subsistere cogimur, satis felices nos prædicantes,  
si in ipsa tractatione inter æquitatem argumentorum  
& exspectationem Benevoli Lectoris nulla reperi-  
atur collisio. . . .

